

四庫全書

集部

欽定四庫全書

文苑英華卷五十

宋 李昉等 編

宮室四

問津臺賦一首

測景臺賦二首

觀風臺賦一首

通天臺賦三首

集靈臺賦一首

烏臺賦一首

問津臺賦

鮑防

惟歲臨乎甲午余經蔡以遊陳見歸然之故臺沒路隅

之荒榛側聞夫子于此問津敢問夫子何負於人淒淒
夫子魯不容身乃泣然而出涕聊託辭以自申玄黃之
初萬物為銅形象既著造化無功匪伊無功不宰其中
禮樂之初崩壞未正詩書既出夫子無命匪伊無命不
耀其聖向使魯同季氏一作孟齊等田常貪浮雲之不義
忘夕露之瀼瀼豈無十室之邑亦有三家之堂奚自衛
而反魯每困窮於路旁浩浩其天茫茫其野近不見於
文武遠不逮於虞夏彼通津與直道故無得而知者已

矣夫子時乎時乎進皆鳥獸之羣退異沮溺之徒霜雪
昏其大澤荆棘穢其通衢撫川陸之險難憫人世之崎
嶇方太公迷殷遇文王伊尹迷莘遇成湯何夫子之不
遇處昏濁而遂亡永追想於遺跡遂投吊於寒荒

測景臺賦

范 榮

大聖崇業萬象潛通據河洛之要創造化之功建以黃
壤亘以紫宮右輔伊闕左連轅嵩銀臺比而可擬瀛壺
方而詎同掩扶桑於日域包蓬萊於海濛式均霜露之

氣以分天地之中於是仰玄穹之文俯黃壤之理下壓
坤德上羅乾緯垂形象物既不假於玉衡司刻探玄何
必邀於銅史具細也難究其妙也若此斯豈光陰而若
易徙且夫聖不可測道實兼致天地與能幽靈必契囊
括衆巧網羅羣藝自然而來疇能比計今來古往時移
道替滋歲月以成朽覺風塵之漸異人有代兮俗疑沒
地有形兮無制零落空階莓苔古砌頽墉遷迤但覺蕭
條高阜荒涼寒城蕪翳攀聖迹而難企感吾徒而流涕

猗歟成周系聖纂極君少臣政流言更逼自陝卜洛其
儀不忒公敷其化人盡其力惠而不費功成事息欽聖
德之微臭豈賦者之能識

第二

以設在天中端
景垂則為韻

失名

瞻彼古臺揆日爰設載徵經始之旨將測運行之節天
地之心可見風雨之交既別玉律匪先土圭是揭以徵
陰陽之短長以察浮驟之晷轍不然者焉可以酌其數
於高空建中天而有截詳厥周典詢諸日官以寒暑為

候以陰陽為端且俯接神州迥當嵩嶺憑累土之增構
運孤標之直影矧因高以垂範異尋虛而捕景分至有
度知王者之迎長盈縮不憊念志士之思永巉巖霄聳
昭明有融九層一驗萬寓攸同彰宣精而示下表無私
而得中況復圭植于臺日生于海當呈象以委照必澄
霞而賦彩兩童之辯猶惑太史之占斯在上千里而是
馳下寸晷而未改嗟夫悠也久也玄之又玄昇大明而
赫矣顧崇址而巋然是以分北陸識南躔審以作程定

此而會期率土中以舉正因茲而仰辨均天唯彼玄德
我后是則普觀端景知立表於天中潛測末光思勞躬
於日昃至若視朔興紀書雲立規浮箭司辰且於室內
建木滅影出淮南子或在天垂豈比夫茲臺之特立平四氣
而正兩儀

觀風臺賦

以曾構重屋以觀八風為韻

失名

我天子德廣虞夏業傳高曾展義之心攸克觀風之禮
必登故臺之用也斯建臺之名也是宏然後度材比德

奢而不盈興功俾役儉而不陋萬物是集百工是湊從
繩罔憊運斤以鬪欸以山立揭焉雲構豈不謂鴻休叶
贊元德時雍錯綜之典不革經始之道克從闢以九戶
聳以千重接祥光於溫液

見張平子
東京賦

納瑞氣於驪峯觀

乎大厦眈眈飛簷穆穆殊形詭制羣品異族或霞駁而
電開或龍蟠而獸伏浩飾彰盛洞文潛蓄既藻井以垂
珠亦丹墀而布玉晴天反照垂螭竦於雕梁霽色澄明
挂蟾光於重屋混合元麗巍峩特起入窈窕兮不知其

所之視瓌譎兮不知其所以及夫西成罷務北陸將寒
霜封原隰雲蔽峯巒金輿斯御綵仗初攢寧侈心以攸
往必風俗之所觀設教陳詩事必彰於禮備承天統物
政本在於人安至如庭宴薰薰衣冠察察其樂將萬其
儀用八奏金石兮匪疾匪徐命鼓琴兮載擊載戛既而
若登仙境若奪神功度宏觀兮其外動變態乎其中傍
眺六合遠視八風吐元和而納純懿詠仁洽而歌道豐
則魏之所造漢之所崇伊制作而靡及豈古今而遽同

客有觀乎順動審彼始終因厥誠兮受慶宜永永兮無窮

通天臺賦

以洪臺獨存浮景在下為韻

失名

行人徘徊登秦原而遊目見漢右之荒臺清風穆其尚在翠華歸而不迴對古情至臨高思來披蔓草以遐想覩離宮而興哀試問薪者乃秦人也云漢之興茲臺之下馳道通乎中禁周牆繞於平野經逝川而不息撫環堵而殊寡昔漢皇帝幸甘泉宮肆目將遠築臺其中高

居物外若與天通祈列僊之戾止致壽聖之延洪繹繹
憑雲蹲蹲捧日千元氣以直上倚長空而迥出危檻宮
堯迴途鬱律植承露之盤開肅神之室將以接上元朝
太一乘大君之登降訪惣真之撫實於戲郊祀之義志
而可採鴻紛之狀望而已改哀壯麗之都失想威靈其
如在徒野鳥之飛來何真人之可待且白日可以精貫
玄珠難乎力求雖層臺巉嶮磴道周流秦時乎西面齊
宮乎上頭仰通蒼昊俯瞰皇州寧不死之可致諒其生

也若浮我國家立太平尚清靜儼宸居以自整絕仙臺
之望幸雖丹檻栖於列宿飛梁歷於倒景有唐堯之允
化一作恭無漢武之遊騁化由其衷居慎其獨有儀可象
無思不服自然為域中之大獲天下之福等南山之不
騫何高臺之是築

第二

同前韻

任公叔

武皇起雲陽之宮致崇臺於爽塏就山谷之交會得神
明之所在近瞰八極周臨四海將端冕而不二必垂衣

而有待是用迴載天路高標地游依俵玄圃想像丹丘
磴道邈以特立通天赫其無儔託神靈於秦甸結元氣
於雍丘白日旁轉青雲上浮八垓可接於咫尺步萬象無
逃於寸眸是歲獻春衆靈咸秩天子乃舉羣祠撰吉日
郊上玄禮太一風伯陪乘蚩尤扈蹕向甘泉以整像屆
通天而挺出既而越氛霧之途近星辰之境背麟衍之
五時面長安之萬井岐陽太華雙標象魏之形秦嶺終
南遙樹軒墀之屏蹈煙霞而有慕潔齋戒而思昔

永一作

奉寶位之虔恭佇神仙於光景當其宵衣待曙暘谷未
開鈞陳匝乎營衛天漢列以昭回燿火周起神光迴來
暨三山之遍登當仰候於斯臺靄靄高躅神祇煜煜喜
氣周旋慶雲迴復召安期於滄海降王母於黃屋樹翠
玉以青蔥草靈芝以芬馥上結綵熾疑高居耳目斯覽
物以懷柔非取樂於幽獨觀乎層構陵空形勢作雄風
起而纖埃不致雨過而瀑溜潛通其載惟厚其覆惟洪
所以大啓於皇祚豈徒峻極于蒼穹是以擁帶休徵感

通純嘏會歌童之曲節彰從臣之風雅立極人望叶靈
王者將大漢之可追願侍祠於臺下

第三

同前韻

楊系

伊昔炎漢功高化洪樂率土之暨阜築通天而且崇初
一貫以發地終百尋以隱空構之以椳梓飾之以丹紅
浮彩外爍流光內融赫兮烜兮獨出煙雲之表壯矣麗
矣迴標天地之中栢梁不同井幹非匹勢岌嶷以山峙
體瞳矐而景軼中邃窅窅入之者當晝而居昏上跂峻

嶒登之者先曙而觀日嵬隄於是乎宴處安期於是乎
暇逸月上壁而旁飛雲綠梯而下出燦燦彩彩靈仙兮
所在若瑤臺之雲馭冠鼇山於溟海炳炳彪彪天子兮
共遊若瓊樓之霞蔚照龍燭於崑丘光玉樹而蔥翠影
甘泉以沈浮於是孝武皇帝紹祚卹胤登眺遠騁高揖
八極俯窺萬井拂軒楯之宛虹步檐楹之倒影乃言曰
可以臨萬國可以遊九垓凡厥層構莫先斯臺窺地底
以豁險壯天門以崔嵬謂四夷不遐將拓跡以開統見

百神咸在則祈禱而禳災既玉女之下視復金鳥之上
迴既而襄雲獻賦文質彬郁且曰陛下承天啓聖聿膺
多福排玉戶於玉堂颺金鋪於金屋亦可以上憂宗社
下恤惇獨何峻極於臺榭恣歡娛於耳目將乘奔而獨
懼矧長途而中宿至矣哉斯言也我皇德循楷式帝錫
純嘏儻茅茨而是陋堯何事乎光宅天下

集靈臺賦

以聖君宏道景
福會昌為韻

張良器

希夷乎人皇居明堂闢陰開陽冠通天兮蔭華蓋發大

號兮流取光將樂瑤池之宴集由喜玉京於壽昌降清
問於宣室討真經於栢梁乃因高為臺順時謀築披翳
蒼剪林麓鏹重岡移峻谷量其遠近以議夫土功命彼
般倕再度乎山木使人以悅無告于勞均力取材不遠
而復屹九重以初起馮一匱規作而始覆具為勢也峨
峨皜皜粉壁光兮朱門開若方丈與蓬萊具為麗也崢
嶸郁煜星柱浮兮雲楣肅狀靈光與景福有時鳴猿告
曉貞松斂靄千峯轉日迎秀色於瓊樓萬歲傳聲和幽

音於地賴磅礴壓乎人境杳劣聳乎天外王喬飛鳥見
息影之翩翩神女窺窓聽鸞歌之噦噦俯衆山兮如束
縈八川兮如帶上方向晦宴息齋心防戒乘金根回玉
軼夸父秉鉞蚩尤揚旆鐵衣沸渭以焜煌寶馬騰驤一作
纒緜而沛艾環鈎陳而列武士震砰訇兮軼埃塏登夫集
靈之臺謂天帝而為會奏無聲之樂寂寞而難分展無
體之禮質素而無文睟容綽約元化氤氲聖主湛恩散
作八方之雨清都喜氣凝為五色之雲彼昇龍鑄鼎之

后捧盤承露之君徒髣象於前載孰能成乎此勛然大
造之德曰生大君之位曰寶未有離於兆庶而復謂之
至道願獻華封之壽上祝唐堯之盛股肱為良元首作
聖用壯辟雍之美乃經靈臺之政豈必沐咸池陵倒景
脫屣乎寓縣棲真乎絕嶺屆中天之峻極從化人兮習
靜然後居無何之鄉去有為之境者也於是情冥具一作
其懿德貴惟恒可大可久不騫不崩動植風靡雍熙日
宏宜具四溟式晏而人和年登

烏臺賦

失名

士有利於鴻漸者觀乎憲臺降太液邇蓬萊風威四警
霜氣傍催地疏曹而獨秀居對禁而分開提綱必理舉
職惟才門凌晨而另出樹夕陽而烏來旌良表正瘳惡
繩回乍以飛騫淒其窳矣時為搏擊吁可畏哉嚴城岑
寂靈臺巉嵯直狀臨而逾明偽迹投而遽剗故座有曩
法門無濫板理從擾而庭幽事雖繁而人簡及夫貪吏
無厭豪宗不戒酷奮黔俗洪威桎械致中典之淪否令

下人之凋瘵百城相師而自若五兵入安而不恠是司

也故以務遠聲哇長喟

若恠切

奉絲綸以巡察騰錦車而

遥屈則跋扈顏沮強梁志憊望驄馬而跼踏仰繡衣而

下拜是知上能贊聖下足安凡顧眄而朝班已肅推彈

而邦度增嚴庶究厥能請循其始官則秦置臺從漢起

或掌方書或稱柱史朱何以忠雅標懿栢陳以剛直著

美上封則起於鄭均埋輪則遠聞張紀虞詡之人方側

目暴勝之名兼直指皆玉秀珠明鷹隼視既幹時而

助化亦圖國而遠恥莫不才挾主以成功主因才而共
理唐纘玉葉蓋臣惟哲法省羸劉臺兼員薛昂涼階宇
奮迅霜雪耿獨坐而情雄邈羣司而位絕稠人廣衆望
影而魂褫暴黨姦雄覩形而膽折豈徒以聳動寮寀
逡巡朝列儻吾道之將行庶從茲而振節

文苑英華卷五十

欽定四庫全書

文苑英華卷五十一

宋 李昉等 編

宮室五

登春臺賦三首

燕昭王築黃金臺賦三首

傷望思臺賦一首

望思臺賦二首

登春臺賦

以晴眺春野氣
和感深為韻

陸 贄

春發生以煦物臺居高而處明俯而望焉舒郁郁之和
氣登可樂也暢怡怡之遠情觸類斯感衆芳俱榮風出

谷以天霽雲歸山而景晴俛視平準傍臨遠嶠窮漢苑
以周覽匝秦城而迴眺林巒彩翠浮佳氣於遙天宮觀
參差麗飛甍於夕照望莫若兮望遠感何深兮感春登
其臺則歷階而至極應乎律故陰慘而陽伸令行斯順
澤布惟均視雖微而必審思何遠而不親懿夫情之誘
人人罔或捨時之感物物莫能假臺有春而必望春何
情而不寫條風始至散灼灼之紅桃穀雨初收潤萋萋
之綠野天何言哉生衆彙人有靈兮感元氣既望春而

可樂亦升高而足貴賞同沂水聊舞雩以詠歌登異觀
臺寧觀蜡而增歎周望既極含情則多媚遲日之未下
憂輕風之屢過目眇眇以心遠野悠悠而氣和可以樂
芳時之景物壯皇室之山河豈比夫羈士登樓而作賦
碩人在軸而為歌者哉春無物而不滋臺無遠而不覽
豈老氏之或論伊潘生之所感稽其趣時之規遠創意
之義深春非臺而何樂臺非春而罔尋故望春者惟臺
是履登臺者惟春是臨繫在物之可用必從時之所任

儻自下而可託庶升高而至今

同前題

韻

苗秀

惟窮愁之伊鬱嗟大塊之勞生登春臺而寫望獨觀化
以娛情熙熙然不知吾之喪我悠悠爾方悟象之難名
矧夫見千門之景霽逢六合之風清夫何化者之自化
使夫成者之自成樂以忘歸嘆盤遊之楚后極而起恨
痛傷心於屈平然則春之為氣可以感人臺之為高可
以觀傲揔山川以窮覽極宇宙而遐眺俯瞻魏闕散嘉

氣之氤氳延望天門登大明之晶耀于時也三農伊始
百卉皆春天地相近雷雲解屯欣大皞之在震嘉勾芒
之御辰以斯觀乎天倪乃無所不至以是觀乎王化亦
何遠不均稽乎登臺之意也寓興寔繁志情蓋寡獨有
役於耳目匪安排於原野爭狗物以矜能建升高而自
下庸詎知澹乎無為道之所貴起乎累土采老氏之玄
言歌彼載陽識詩人之所謂方發生之道達屬陽和之
布氣登臺謂何雅興逾多玩韶景而則麗聆微風而轉

和雖黃鳥之可悅無同人而則那時來何歡物至而感
思千里之遐騁登九層以流覽褰裳未濟徒有望於江
湖藻鑿高懸且欲呈其肝膽故其取類也遠寓興也深
庶鑒登高之賦無遺入爨之音

同前題

同韻

張濛

達萬類者莫尚於和氣鬱萬類者莫極於幽情故登臺
而豁望得寓目於春榮高臨乎雙闕迥出乎重城洞千
門而拂曙披九陌於初晴雲當軒而氣潤風溢檻而光

清陰始分而土膏起陽已動而泉脉生縹緲九層之端
希微四達之眺春馭興而搖奮興牽春而窈窕鶴鷓來
於東野鴻鴈去於南津愛烟霞而改舊嘉草樹而含新
思欣欣於麗景情艷艷於韶春雖愔陰陽之義且知天
地之仁我國家道洽一作合衆靈化涵諸夏吹律豈勞于
鄒衍操音寧藉於子野德被荒遐而有截澤周品物而
無假因壽域以同歸奚樂郊而獨寫是知氣之所感者
情情之所和者氣氣苟達而內愜情必洽而外慰等彼

純綿之溫若享太牢之味固在極於羨溢寧止臻於髣髴不然者太昊之令何榮老氏之言安貴而已也春臺高兮勢峩峩鶯亂囀兮傳伐柯聊登陟兮一過攬春心兮未和春臺曉兮光淡淡花競落兮如萋萋遠憑臨兮一覽嫻春心兮多感感因外而重遣和自中而再尋任三陽之榮悴齊萬化以浮沉風何知於虎嘯雲何識於龍吟猶春臺之蹈泰與聖政之同深

燕昭王築黃金臺賦

張式

燕昭以齊魏黷武楚趙專征地僻援寡城孤勢輕體未
遑於安席心每寄於懸旌外矜嚴以示懼中慷慨而不
平欲羅天下之彥搃海內之英爰築臺於國以尊隗為
名知夫喬林之木可選他山之石可轉將在物之非珍
謂求覽之不顯苟白駒之可繫信黃金之可賤且設而
為已則以奢設以為人則為善爰然既就赫矣斯存象
徘徊於前殿色晃朗於朝曦人所貴惟金我以為土時
以士為賤我以為尊誠列辟之未制掩前經之所論昔

銅雀創於鄴都陽臺起於荆國聳高麗之殊觀備珍竒而盡飭徒竭用而殫人自矜豪而逞力洎夫遺情總帳徒愴淫心結夢巫山空資穢德豈同夫慮成經始所寶惟賢初假物以求士終得魚而忘筌不然者烏將棲於茂樹魚自躍於深淵臣亦效誠於大國人遠誰仕於弱燕所謂興亡必繫於賢哲勝負寧由於衆寡庶斯焉而取斯誠大者而遠者及夫劇辛不召而至樂毅無媒而萃咸委質而納忠願長途而騁驥然則賢為強國之器

臺實招賢之餌空悲霸業之雄不覩濫觴之自異乎哉歷
萬古而共觀信諸侯之一致後之士寧無郭隗之才後
之君但守燕昭之位是以千乘雖貴一士雖微必禮之
而後為用必求之而後能歸不可誘之以利不可劫之
以威因酌古以道意惜臺平而事非

同前題

以殊禮釣士克
昌其功為韻

獨孤綬

戰國之分裂寰區境削兵抑者不惟燕乎昭王乃卑身
以勤德懷霸業之遠圖伊取士之或異及成功而莫殊

抗珍臺而臨碣石廓賢路而走幽都表之以高居尊之以厚禮曷云成土木之弊適以備股肱之體於是雲竦山峭穹崇竄窳架塊坳以上馳飭金寶以內照泛易水之浮景蔭尾星之垂耀是為層構臨而時傑臻亦猶甘餌懸而巨鱗釣展禮於此感之在彼降其尊以奉其卑豐於物而薄於己臨燕薊之衆目傾齊趙之奇士士之得可霸其將四海有焉士之失且亡豈直千金而已然則作為臺館實耗財力始若勦人終能肥國宗歌澤門

以歸怨燕尊郭隗而耀德苟順動而若斯尚何求而匪
克義積道光聲馳風揚羣材並用墜業乃昌屈於一人
以釣士則開霸而圖王侈於一臺以釣國則無大而稱
強誠異虜其臣而必弊瓊其室而是亡且惟臺則沒矣
代如何其綿邈千載蒼茫一作芒一時孰為來者魯莫嗣
之國是其興鑿黃金之豈悛賢如可得下白屋而寧辭
故九九之術不棄齊桓以成功善善之道克廣燕昭以
垂風用能首五霸冠七雄抑未有為國而失士可攄盛

烈於無窮

同前題

韓徹

伊君有燕國隘朔邊當昭王旁求致理遇郭隗自舉推
賢乃曰人思爾得禮由我先既築高臺所損者寧辭百
鎰斯為下士效死者何啻三千苟柱石之來助冀土宇
之獲全原夫累土足階披沙何損勢迢迢而迥出價洋
洋而彌遠寧同戲馬興誘勸以立基有異思仙得富強
而為本爾乃經營是設積思方成歎危既差於九仞委

棄自多於一簾潛思潤屋之謀實不足貴遠得利國之
術賢豈能輕所以士因臺而取重臺因金而播名振一
時之德美傳萬古而風清是則厥狀足徵斯義可考孤
峻上符於臣節崔嵬下瞰於王道將昭千乘繼文侯忠
良為心未敢一言得季布誠信為寶所謂南金置而非重北
方倚而自強來側陋以畢至歷磴道而可常乍激天風
還如擲地之響斜臨都邑更同懸一作市之光想夫典
刑有準聲教可則若周室之稱靈似殷鼎而在德穹崇

可仰權謀實自於一夫綱紀更張威刑遂加於四國豈
比夫銅雀美於魏日章華侈於楚時顧凌雲之小者何
積瑤而方之今與燕非匹惟唐接踵康衢絕扣角之詠
仄席無築臺之寵顧斯賦之至微安敢為重

傷望思臺賦

陸贄

桃野之右蒼茫古源草木春慘風煙晝昏攬予轡以躊
躇見立表而斯存迺漢武戾嗣勦命地也然後築臺以
慰遺魂吁自古有死胡可勝論苟失理以橫斃雖千祀

而猶寬當武帝之季年德不勝而耄及浮誕之士疊至
詭怪之巫繼集忠見疑而莫售讒因隙而競入忘嗜欲
之生疾意巫詛而是因將搜蠱以滌災縱庸瑣之姦臣
嫌何微而莫售寬雖毒而奚伸構儲后以掛殃引具寮
與齊人旋激怒而誅克竟奔湖而滅身異哉漢后因奸
邪之是誘俾冢嗣而罹咎彼傷魂之冥冥故築臺其何
有嗟爾戾嗣盍入明以見志遽興戈而自棄諒君父之
是叛雖窳身其焉寘嗚呼一失其理孝慈兩墜不其傷

哉夫邪不自生釁亦有托信其讒興御疑則妖作恣鬼
神之愆變寔人事之紛錯故子不語於怪亂道亦貴乎
淡泊蓋為此也水滔滔而不歸日杳杳而西馳時經往
兮莫追人共盡兮臺隳榛焉莽焉俾永代而傷悲

望思臺賦

陳山甫

漢武帝以惑亂生聽衛太子以危疑出奔始誤讒諛之
巧長遺覆育之恩高臺有揭悔過無門峩峩九層已斷
興哀之目眇眇千里不歸幽憤之魂嗟乎望以窮高思

以及遠為父之慈靡及恨而莫失為子之道既垂慙而
勿反當其版築初設土工聿修旁窺日轉下視雲浮所
以取其遠無不鑒近無不周導宸衷於曠望表玄思之
殷憂豈比夫栢梁為耳目之翫通天窮汗漫之遊流盼
無涯增懷永久意來思之可待念追悔而終不事殊子
役空引決以自傷跡異申生諒為孝而何有悲夫見危
致命有去無歸誠一朝之忿斯極豈三年之恩可違於
是跨層高之杳杳屬遠思之依依俯潄雷之音常思出

震仰列星之象猶戀重暉豈知登臺有悼往之心陟岵
無懷歸之歎曉光東上含萬恨而意深暮色西沉向四
隅而望斷徒勞乎積財厚地累土長空想迢遙於玄圃
悲寂寞於青宮鑒失聰明將後悔而何及臺高雲漢自
貽咎於無窮原夫義絕君親禍由臣僕致兩傷於疑忌
在一言之所黷是臺也可以申鑒於後王豈徒處高而
縱目


望恩臺賦

蔣凝

路入湖邑臺名望思幾里而雲瞻累土千春而草沒餘
基仙掌一峯遠指江充之事黃河九曲旁吞武帝之悲
昔者漢祚方隆皇綱失理因巫蠱之事作有讒邪之禍
起宮中既得其桐人臣下皆疑於太子龍樓獲謗方儲
副以難明鳳閣無恩遂出奔而至死保傳徒爾園陵在
哉千秋感悟萬乘傷摧齊誅子糾以無道晉殺申生而
可哀於是憑大野築高臺目極心存知繼體之何在天
長地久庶招魂之一來緬彼沉寃登茲極望英靈無髣

鬚精魂丘隴有蕭條情狀見舜井以咨嗟念羸博而惻
愴烟昏日慘全非望月之中鶴唳猿驚不在通天之上
帶嶮崢嶸何裨死生非唯滅天性害人情抑亦傷國體
敗家聲臨百尺以凝眸終天曷覩向九重而含恨何世
能平雖然事出妖訛奸生結構宜北闕之聽君命奚東
宮之有私鬪子臧在側斯人比鄭叔何殊商洛非遙此
事亦芝翁不救往昔于今陵高谷深遊鹿而征人舉首
悲君而逋客傷心曰子曰臣可念茲而誠勵為君為父

宜到此以沉吟且王者為域中之大太子是天下之本
何周公之不法而秦相之可損吾欲碑戾園望苑使有
家有國鑒此臺而不遠



文苑英華卷五十一

欽定四庫全書

集部

文苑英華卷五十二至七

詳校官內閣學士臣瑞保

助教臣常循覆勘

總校官進士臣朱鈐

校對官中書臣葉蘭

謄錄監生臣李奉瑞

欽定四庫全書

文苑英華卷五十二

宋 李昉等 編

宮室六

登姑蘇臺賦一首 古銅雀臺賦一首

朝元閣賦三首 初日見朝元閣賦一首

大廈賦二首 柱礎賦一首

階賦一首 中堂遠千里賦一首

登姑蘇臺賦

任公叔

司馬遷世掌天官才稱良史探禹穴之遺跡紀吳國之
覆軌乃憮然而嘻曰登此姑蘇之墟淹留兮躊躇感斯
宇之基為沼而仲雍之祀忽諸我聞周道既衰諸侯狎
主中無霸王蠻戎振旅始闔閭以信威終夫差以極武
左與勁越同壤右與強楚為鄰內有高臺之築外有遠
畧之勤積如莽而暴骨亦如讐而視人是以疆場日駭
版築未弭方五載而厥成造中天而特起因土累以臺
高宛嶽立而山峙或比象於巫廬之峯或倒影於滄浪

之水悉人之力以為榮觀厚人之澤以為侈靡斯實累
卵於九層夫何見乎三百里俚語有之曰川壅則潰月
盈則匡善敗由己吉凶何常矧謀主之賜劍若沙川兮
無梁以為棲越以求霸卒見秦吳而受殃客自南鄙觀
乎江濱徘徊舊德惆悵前聞試遊目於寥廓曾歸然而
參雲聽逆虐而翳諫竟麋鹿而為羣高天放曠平湖決
漭奕奕孤嶼茫茫極浦悲早鴈於海風嘯寒鷗於江雨
况復關梁坐隔羈旅增愁山木將落汀葭亂秋思美人

今何處獨懷邦兮遠遊彼名遂以身退顧與范蠡而同
舟東吳王孫有睟其容因少為唱曰中心不必兮子胥
何為懷直道而驟諫遭重昏之見危將漁父以杭跡且
垂釣於江湄高臺既傾夕露沾衣感蒞國之不及冀來
人之與歸者也

古銅雀臺賦

張鼎

伊昔三方列峙惟魏宅中五都分設因鄴為宮北走邯鄲
燕薊南馳鄜衛河潼於是聖武欽若啓戎締經國之

初構立濟世之元功受命而創洪業取威而定羣雄土
德王始炎靈告終天滅漢歷國封魏公黃星徵於分野
素秋建於茅社諏良日兮御靈壇坐千乘兮馳六馬錫
彤弓兮張海外授金印兮安天下不飭不美無以壯哉
營宮營室是為王者乃僇梓匠掄環材伺農隙悅子來
六府垂象制文昌之廣殿百工獻藝造銅雀之高臺壯
閭闔於昭回軼沆瀣於烟埃俯臨而漳滏水合仰觀而
宇宙天開返道截梁兮漫延紅移縞壁兮徘徊連雙闕

於日表飛累榭於雲隈崒如五岳干霄而岌立對若三
山出海而崔嵬金雀躡甍而欲翥玉螭盤柱而將迴召
詞人於華屋留舞客於瑤杯登高必賦無遠不該洎乎
鞠旅卽筴反旆咸洛雖納漢以吞江終頽山而擠壑遷
神於建始之殿返葬於壽陵之郭慷慨遺文淒涼舊閣
罇盈玉座燈映蘭幕婕妤妓人鼓舞歌唱當春月而朝
臨悵日暮而西望見松柏之成行愁歌舞之相向異哉
戰雖必克愛亦有捐戰可以力勝愛難以威全撫四子

兮魂斷念六宮兮涕漣何壯圖之天闕而閨思之婵娟
紆曲念於弊履昏盛德於繁絃非達人之所繫豈至尊
之宜然歲月其除君王安在出入三國芟夷四海號諡殊
徽質文異彩及石氏之謀帝位高歡之竊神器雖修舊
而增崇竟移時而改代銅龍噴水似落九天金鳳銜珠
終淪五絲我君遑遑行指鄴旁弔古太息馮高獨傷東
郊道兮蕪漫西原樹兮微茫露窰窰兮泣蒼蘚風蕭梢
兮悲白楊粧樓歇艷盡閣銷香陂陀巖岫巋崑崙摧葳井

榦滅兮有遺礎殿垣毀兮無華構但見蓁蓁蒿棘生復

看齷齪饑飈鬪雨嘯幽巖

渠希切又居希舉豈二切

月哀離狝宿莽

撐骨危巢覆轂平臯晚兮拱木生寒紫陌昏兮黃埃奪

晝人壽幾何留恨日多追士衡以投弔效明遠以作歌

歌曰銅雀蒼蒼對古堦清風切切有餘悲試憶望陵三

五夜便是西園明月時

朝元閣賦

以高抗山頂升覽清遠為韻

錢起

上將恢帝宇壯神舉斷景山之松用而有節感子來之

衆役不告勞成仙閣之弘敞配紫極之崇高先是徵規
模宏大壯經始聖迹責成梓匠當桂戶而八水悠遠植
玉堦而千巖相抗升陽烏於赤霄之表棲玉兔於翠微
之上可以吞貝闕壓崑閭盛矣哉亦神明之化也不可
得而稱狀觀乎儉以示德高即因山虹梁天近丹陛雲
還漢武求仙望蓬萊於海上吾君有道致方士於人間
厥構既崇其寧惟求正色深沉於木末浮光嶙亂於山
頂如翬斯飛獨出于頽農務暇霜氣澄天門闕龍輅升

俯人烟於萬井小雲樹於五陵天臨宇宙日照黎蒸是
時也靈仙響集品物交感因高載著於人風有象寧遺
於睿覽聖人垂一作化稽古上清彼會昌之構宇得朝
元之美名不奪穡地知庶心胥悅高標靈阜表聖壽長
亨襟懷動植指掌寰瀛將九圍載廣與三光克明斯乃
棟宇之大也雖前史莫之與京夫如是古之濬城隍飭
宮苑孰比我君居高而致遠

朝元閣賦

同前韻

孫翊仁

神之本也以朝為大乾之德也以元為高合二美以制
閭俾萬人兮不勞何哉彼朝元之為狀厥高因於崑嶂
岌業兮初謂湧於山巔崔嵬兮又謂居于天上崇崇之
勢博敞宏壯斜窺渭北笑玉樹而徒空俯對終南與金
闕而相抗迥出象外信非人間陽烏乍轉以迴翼翔鷗
不逮而空還七聖同遊罷還襄野萬國以會自是塗山
既而玄冬啓景六合清迥法駕行幸於溫泉羽旆駢羅
於高頂帝乃躋稜層考休徵天之動日之升馳繚垣以

望窳窳開閭闔而越凌兢視遠如邇臨高可憑予以旁眺
予以迴覽窻前桃實在方朔之深知閣上鳳巢表帝軒
之聖感昔秦皇學道漢主長生祈年既築望仙復管人
既勞止事卒無成豈比夫向背山澤密邇王城池八水
而下臨無地階重巖兮上摩太清至若早霜啓色積雪
初晴壯太山之日觀比天台之赤城信我后之攸處與
神仙之混并嗟乎登高作賦十上何晚題陸雲之閣吾
道應行薦揚子之文其事不遠

朝元閣賦

同前韻

失名

皇帝於驪山之上起仙閣於神華得凌雲之體勢彰考
室之劬勞冠千峯而迴出聳百尺之彌高蓋取惟清惟
淨而藉乎以遊以遨千碧霄而宏壯依絕頂而高抗仰
之者目眩心驚俯之者興逸神王納烟霞於袖裏看日
月於掌上改山為會昌之號建福無疆題閣取朝元之
名升天有望徒觀其出地表俯人寰飛重簷之日下疊
千拱於雲間金鋪燭耀玉碣苔斑蓮井雕梁之彩錯綺

窻網戶之虛閒屹屹然下臨千仞亭亭然遠對黃山若
乃初旭澄霽則勢能孤迥早霞初照如赤城在天台之
峯積雪未消若銀臺處蓬萊之頂每歲農務隙寒事興
聖人之玉輅是動金梯是凌限三休而爰至歷重檻而
方憑寒鴈正來下秦山之八水暮烟初起繞漢家之五
陵以人心為心則遇物多感以真趣為趣則放情玄覽
豈不由登此而存所誠處此而無所營方抗隱而述物
覺山空而益清七聖不迷勝軒轅襄野之遊豫萬靈畢

集若夏禹塗山之會成昔周日之中天擅美秦代之阿
房著名既煩費於徭役復荒淫於性情豈與夫險不恃
兮高不傾囂塵絕兮虛白生光一人之息偃歷千載而
彌遠者同日而言哉

初日見朝元閣賦

以赫臨曉雲高
出蒼翠為韻

郭遵

新豐之路今朝元有歸客見初陽于東嶺照層閣於南
陌惟閣也憑高不傾惟日也臨下有赫既矐矐而延燭
曷埃盭之能隔陽烏之翼兮若駐禁林義和之轡兮若

頓高岑蒼蒼之質纔辨杲杲之光稍臨發璇題之麗色
開玉戶之宿陰浮輝外融峻勢無不呈其壯引耀中朗
邃宇無以閔其深于原之表揭雲之杪映朱檻以充一

作一

形融凝粉垣而晶皎司晨而見異星樓之麗霄質明乃
光殊日觀之生曉陽彩舒文昭然可分晞拂簷之夜霰
辨出棟之朝雲類列仙降真祥光綿幕疑大君臨御瑞
氣氤氳諒清旭之初起非反照之猶曛日惟至麗閣亦
蓋高竦莫大之標洪纖奚比委無私之照巨細何迺是

以詭狀摩天殊姿詳悉樂虬欲動謂起蟄於春光并蓮
倒披若爭開於夏日的燦交映峇堯上軼不殊南榮之
明奚獨東方之出閣之峙矣于彼高崗閣之麗矣于彼
朝陽據厚載於秦雍隣顛氣於穹蒼豈比崑崙之山俟
燭龍銜耀鳩鵲之觀俟金波寫光孰若列皇都之次鎮
王畿之位近白日之貞明總離宮之蒼翠祥雲不散意
往仙如存耀景每臨誠望幸可冀因徘徊而寓目遂舍
毫而寓意

大厦賦

以君子用
吉為韻

彭殷賢

遐觀邃古，逖聽前聞。北辰居正，南面為君。莫不茅茨土
階，以恭儉而為度。上棟下宇，避燥濕以為文。聲芳訐謨，
乎五典。德廣兆暎，於三墳。迨乎纘戎，天秩啓迪。人羣以
為百堵，仄陋不足以光先正。九筵迫狹，不足以垂景勳。
於是資輿區而寫城闕，憑大壯而列宮禁。杞梓庀匠于
季穉，林衡僇木於毫分。既而工用其法，人來以子馨。鼓
逢逢，版築儼儼。離婁督繩，以為度。一作般輸削墨而為

砥倅造化以制作越埃壘而資始珠網滴瀝而露垂丹
刻翬飛而霞起危簷矗以露斷高閣立而雲倚遠而望
之莫測其端倪迫而察之但驚其峻峙仰鷗鵬之不逮
豈燕雀之能擬於是發禮以釁之勵樂以樂之可謂休
以令聞垂之億種者也既而馮陳就閒是遊是縱笑語
卒獲聲色攸重邀觀一作歡則環拜興舞命賞則夾道羅
從以為一生之歌斯哭斯千載之善禱善頌豈知海縣
則天下所有帝王則黔黎攸共固惟不節之嗟蓋不知

其所用也豈與夫明主君臨邊鄙靜謐儉以足用貴在
無佚尚菲陋卑宮室為無為以自保事無事以終日故
得國家載寧帑藏充實福祚乃於萬斯永子孫則百而
逢吉屢降哀矜之詔頻優耆老之秩斯可謂皇哉唐哉
唐哉皇哉而天地長久何三五之能匹也

大廈賦

同前韻

郝名遠

昔者天地氤氳洪氣始分穴居野處獸聚鳥羣逮乎聖
人演卦垂文上棟下宇信宮室之取則紫微黃屋表巘

廊之在君爰制廣廈克崇景勳崛起黃道孤橫翠氛歸
崑穹崇若巨鰲負山出大壑巍峩爰葉似神龍飛漢矗
長雲原其本也葺事作圖成終慮始命班倕召王爾鏟
崩嶷平遷迤斬豫章之榭楠伐雲夢之杞梓關山百轉
水陸萬里江妃析藏捧明月而時來泉客辭波薦夜光
而止於是規模具工徒庀經之營之載考載擬版築
既畢剏厠將已邈矣層構仡然獨起觀其萬栱交穿千
櫨叢倚連甍軒昂以鳳翥飛龍夭矯而虹指麟次翼張

岑立岳峙綺䟽齊列洞戶相似翕絕殿烜一作雷電煥爛倚

巍山梁藻椽蟠蛟螭於上楹方井圓泉姹芙蓉於倒水

壯而且麗豐不踰軌輪焉奐焉美矣盛矣懿其梁棟之

任固非斗筭之子夫成大海者百川所歸構明堂者多

材是共亦猶一人出兮百寮從爰建股肱而作輔當其

無而有室之用張公獻禱奚子作頌蓋亦美上古之淳朴

防後代之驕縱皇矣上帝臨下有秩六合清晏八荒夷

謚方將抑末敦本斲雕歸質異茅茨而立宇惡其飾以

取卑宮之名削土階而度堂起其厚而崇破觚之實猶
且明敷沉隱寤寐英逸燕雀聞而相賀鸞鳳來而應律
思與羣公卿士衆官庶匹議經濟之法度籌安危之得
失優哉游哉日慎一日斯乃國家之盛事嗟難得而賦
述獨有間迹林野洗心蓬華想芳桂以淹留撫寒松而
未出希薦之於大廈保柱石之終吉

柱礎賦

王 誼

稽古太初穴處巢居則大壯之垂象上棟下宇成其室

廬迨于中葉僭奢違道木衣緹緗土被文藻列蟠螭於
欄檻拖長虹於榱橈謂柱柱之不堅施柱礎以侔其壽
考相萬祀而一人偕天地而相保其始也徵士尚方聚
徒嵩畔經迴溪之紆鬱梯崖莪於天半披林離之脩蘿
刮莓苔之爛漫曜雲霞之彩駭嘉錦章之輝煥圖嵌空
設妙筭或攻或鑿叫嘯相贊礪山成雷擊石火散初髻
髻而縷析忽砮碣以冰泮五丁力殫九牛流汗自彼幽
藪登庸華觀乃命王爾操繩公輸削墨規上成範方下

為則錯坎缺之參差開青熒之古色入紅壁對朱扉廊
迴月皎殿廣星稀隨風起潤逐日呈輝扣逶迤之環珮
拂迴旋之舞衣及夫荏苒時移崢嶸歲久堂惟荆棘塵
埋戶牖嗟建章之火流何金石之可守礎則不易人將
誰壽礎兮礎兮金堅固曾見深宮幾人故夫礎之為德
既堅且貞華而尚素晦而尚清象君子之待問扣之則
鳴誠在位之有式居必底平平則可久久則不傾無靳
固而守樸非昭章而眩明庶夫人之銳意覽茲物而篤

誠

階賦

樊晦

昔在軒后棟宇惟新摹諸大壯賴及萬人修宮室以齊
列起窻戶而相因然後橫高階於左右次危級之相巡
上差峩而山起下崩劣而龍鱗生萸英於堯日舞干戚
於舜辰亦可以望聖帝升降觀享願賓若乃憶趙妃之
嬌妬窮漢武之寵慾昭陽特起麗飾繁縟梁纏藻繡窻
綴丹綠砌鉛黃金階闡白玉使宮女而擯望聊優游以

自足下朱履而影亂參差度羅衣而香飛斷續亦有珍
物旁秀瓌竒四燭珊瑚碧樹弄晴風明月隨珠耀初旭
及夫陳后長信獨遭弃捐塵駁紫蘚庭鋪綠錢望金屋
而魂絕對玉階而愁連至其戰國云亂七雄相躔秦兵
大起圍邯鄲而已合趙楚同會運籌策而未宣嗟兩君
之不決歎毛公之獨賢歷高堦而直上挺長劍而無前
豈不以斯階之見陟光厥事而能全既而衆狀叢開竒
勢難纂或干天而上峻或盤空而不斷望之則意悅升

之則少緩對謝庭而玉樹中榮臨兔園而芳薇上滿睹
臺殿之要者實莫過於茲階美崢嶸之壯麗故作賦以
攄懷

中堂遠千里賦

以心曲聲光此
時勿阻為韻

謝觀

峻宇沉沉朱門阻深豈為遙遠有蔽徽音跬步之中易
在一言之地踰時之達難於千里之心莫不佇立盤桓
瞻風躑躅或恃穹崇以懈傲或麗欺誣之阨束遂使阼
階之上迨還於天子之田蕭牆之間綿邈於黃河之曲

且夫百里之遠一日致之中堂之近經旬履之而所以
借淹留之喻等邂逅之期豈君子同風之地在小人草
面之時瞻廊廡之不遥便成燕宗念庭除之匪邈差若
毫釐是絕音塵有睽言語非入室之士過作脫巾之阻
布武之中疲赤驥於崇朝及肩之牆困鴻鵠之一舉唾
井之路寥夔及門之子迴翔希日日以見德尚朝朝以
觀光每望恩波如桂水之流淼淼時瞻德宇若金城之
路茫茫似蔽黃雲纔同明月高深起於顧盼山岳生於

倏忽於是以南軒北宇之嶽岑作河東河西之間越如
此禮讓無成薰蕕不明東閣苔滿西園草平倒屣之餘
風頓削握髮之清規不行自杜其匡諫之路詎聞乎哀
樂之聲是使咫尺蕭條人遐室邇空施振闢之橫壯但
見樓臺之灑迤則可以自勵於已寧求於彼君子勿嗟
行路難古來如此

文苑英華卷五十二

欽定四庫全書

文苑英華卷五十三

宋 李昉等 編

苑圃

朝會

靈囿賦一首

九城宮東臺山池賦一首

太平公主山池賦一首

集賢院山池賦一首 叔孫通定朝儀賦一首

南蠻北狄同日朝見賦一首

朝呼韓邪賦一首 周公朝諸侯於明堂賦一首

靈囿賦

以仁及禽獸
均樵牧為韻

徐元弼

代間秦餘地仍周舊俯皇都之近域有文王之古囿遙
縈林麓之表遠抱川原之秀沼莫辨於窮流臺靡遺於
層構往往歸鳥依依顧獸逢時之慶雖鍾思古之懷亦
疚當昔周德資始靈臺是新繚以斯囿洽其至仁使芻
牧畢入而獮狝皆馴日以靈知感通於異類大其囿見
愍洽於蒸人固以垂耿光本亭育無私公共而有俟
一作候勿亟子來而以築不麇不卵仁叶於羽毛以薪以蒸

惠昭於郊牧，覆露功溥。誠明感深，遂天性於物性。即人心於己心。白鳥不驚，匪觀於狎物。非熊已兆，奚事於從禽。嗟乎遺址全平，餘風可挹。想千古之蹤未昧，歎三代之英不及。猶欲恣窺臨淹，佇立微茫。似隔乎烟水，邈迤半臨於井邑。見魚躍想坎窞於泉流，聞鹿鳴訪陂池於原隰。竟以陰壑蕭條，荒榛寂寥。無人試問，有路通樵。悵望風烟之景，沉吟黍稷之苗。今國家以榮古為心，宗周是繼。且欲儲休祉，降嘉惠。園苑資靈囿之規，宮室擬靈

臺之制是以愛物之誠溥好生之德均仁政潛施於上
苑之內靈德已播於率土之濱然簡弋遊於暇日縱芻
詞於賤臣稽制度於盛王百里猶小嗣風流於前古千
載為隣

九城宮東臺山池賦

并序

王勃

九城宮東臺地接開曠面山臨水爾其松峯桂壑紅泉
碧磴金石千聲雲霞萬色侍郎張公雅思沉鬱永懷梓
匠式侔仙造聿構靈廔仙流成止水之源拳石儼干霄

之狀雖流波覆簣俯藉人機而布葉攢花妙同天繪僕
因暇日濫奉清埃敢抽南畝之才聊叙東山之事云爾
若夫金臺妙境玉署仙居酌丹墀之曉暇候青禁之宵
餘馳冲情於月道飛峻賞於烟墟指山楹而思逸懷水
鏡而神虛既而仰瞻頰嶠傍窺黛壑複嶂烟迴攢溪霧
錯偉沉用之兼濟想神功之可作規疊獻於盤龍憲飛
泉於掛鶴覆簣而營巖磴浮芥而環州嶠採拳石於瑤
濱牽纖珠於綺薄萍徙楚江之帶花轉崑墟之萼岫蘊

玉而鴻鷺浦涵珠而星落美仁智之同歸信高深之縱
托爾其危岑漏景曲渚留寒高松偃鶴清篠吟鸞被蘭
丘而結佩照蓮服而披冠激坳堂於別淑引膚寸於危
巖若乃嶺分雞秀波連鳳液花鳥縈紅蘋魚漾碧綠衣
玄衽頰鱗翠額在林藪而同驪望江湖而齊適每至景
沉西寧月下東濱峯深夜久潭靜秋新荷抽水蓋薜引
山茵雪芝獻液露菊傾津嗣南商之逸興有東海之遐
賓保林泉而肆賞混簪綬而同塵何濯纓之有地如攀

桂之無因

太平公主山池賦

宋之問

粵若公主祗生

集作
誕生

皇家太平徵郡國以選號叶時雍

之美名孕靈娥之秀彩輝婺女之淳精虹美電熠蘭香

玉清稟金后之玄訓係列聖之聰明厭綺羅與絲竹愛

瑤池及赤城構僊山兮既畢侔造化之神術其為狀也

攢怪石而岑崟其為異也含清氣而蕭瑟列海岸而爭

聳分水亭而對出其東則峯崖刻劃洞穴縈迴乍若風

飄雨灑兮移鬱島又似波沉浪息兮見蓬萊圖萬重於
積石匿千嶺於天台荆門揭起兮壁峻少室藪生兮劍
開削成秀絕蓮華之覆高掌獨立窈窕神女之戲陽臺
爾其樵溪釣浦茅堂菌閣秘僊洞之瑤膏隱山家之場
藿煙岑水涯繚繞逶迤翠蓮瑤草的礫分被映江潯而
爛爛浮海上而纍纍迺之杲與衡霍豈吾人之所為向
背重複參差反覆翳蒼蒙龍含青吐紅陽崖奪景陰壑
生風竒樹抱石新花灌藪向若天長地久兮苔蘚合古

往今來兮林澗空始燕秦而開徑訪靈藥乎其中其西
則翠屏嶮巖山路佶曲高閣翔雲丹巖吐綠忽兮恍涉
弱水兮至崑崙杳兮宜乘龍梁兮向巴蜀壯岷嶓兮連
屬鬱氛氲兮斷續巖虛兮谷峻藏清兮蓄韻含珠兮蘊
玉衆彩兮明潤芳園暮兮白日沉爽氣浮兮黛壑深風
泉活活兮鳴石葛藟青青兮蔓岑羅八方之奇獸聚六
合之珍禽別有複道三襲平臺四注跨渚兮交林蒸雲
兮起霧駕鸞水兮鳳凰樓文虹橋兮彩鷁舟山池成兮帝

子遊試一望兮銷人憂
召七賢集五侯
棹浦曲席巖幽
鳴玉佩兮登降列
金觴兮獻酬未窮
觀而極覽忽雲散
而風流於是乎
上客既旋重扃
嚴閉榜童儼而
高登綵女分而
為衛牽水葉兮
張水嬉摘山花
兮詠山圻燕姬
荆艷兮代所稀
鳳舞鸞歌兮儼
欲飛披烟弄月
兮宵未歸桂枝
清霧兮濕羅衣
奕奕濟濟夜旋
玉邸隱隱崇崇
朝趨帝宮銀鑪
翕習烟生霧集
絳節繽紛揚光
吐文行軒即水
去馬勝雲銜銜
翼翼兮馳丹闕
超超遙遙兮向

紫氛寵極兮慈掌情勤兮幽賞戀宸扆兮出入憶幽山
兮來徃採朱萼兮山之側步蘭庭兮候顏色掇綠蘋兮
于澗潦宜室家兮叶仇好既而貞心內潔淑則遠傳詆
談者聞之而必勸缺薄者聞之而凜然况復淮王招隱
秦主隨僊美子房之琴瑟驅碧落之風烟賓屈宋於珠
履引鄒枚於玳筵秋葉飛兮散紅樹春苔生兮覆綠泉
春秋寒暑兮歲榮落林巒沼沚兮日芳鮮吾君永保南
山壽車馬往來千萬年

太平公主山池賦稟金后

集作稟于后

聰明

集作聰英

岑峯

集作嶽峯

樵溪

集作樵頭

分被

集作分披

映江

集作景江

生風

集作藏風

向若

集作杳若

始

燕秦而

集作兮

翔雲

集作翔風

乘龍梁

集作龍飛

兮

芳園

集作芳圃

忽雲

散而

集作兮

高登

集作齊發

綵女

集作合

燕姬

集作妹

清霧

集作清露

朝趨

集作朝還

馬勝雲

集作騰雲

子房

集作紫房

璫筵

集作象筵

集賢院山池賦

杜顓

鬱乎羣賢之林有山其秀有池而深幽流淡泞蒼翠嶽

峯千門下隔三殿旁臨引彤庭之佳氣涵碧樹之清陰

連綿芳草遊泳仙禽對石渠之鉛粉會金馬之衣簪宛
雲霞而在目眇江海而為心何扁舟之獨往何倒影之
遠尋懷我魏闕浩爾長吟山池之陰可以清吾襟山池
之所可以狎吾侶涼風忽起白雲時舉步苔岸之周流
藉松溪之積阻邈矣幽興颯然清暑乃登玉巒撫金渚
圖書載暇纓弁以序此焉遊處於茲宴語發菱花而不
能歸攀桂枝而久延佇日落池上雲無處所爾其秋風
既起秋興爰至見藤篠之幽媚弄石泉之明媚禁林餘

雨增曲雷之華清御苑晴烟借遙巖之積翠是以洗雪
煩想優游雅思嗟乎山中人兮猶未識池上蛟兮焉可
得顧蘭芳與菊滋從此賞兮無極

朝會

叔孫通定朝儀賦

以制定朝儀上
尊下肅為韵

白居易 集無

稷嗣君上稽天命下察人聽以為作樂者存乎功成制
禮者本乎理定故易尚隨時禮貴從宜于以致理何莫

由斯允矣君子休哉令規採三代之帝典起兩漢之朝
儀于斯時也秦吞六雄之後漢承百王之弊禮壞樂崩
上陵下替將欲剏洪業尊皇帝馴致王道丕革季世莫
先乎正位以經邦體元而立制者也夫其將用於國先
習於野辨度數於聲明文物審等威於君臣上下儒生
肅以濟濟物有其容國典煥其煌煌禮無違者然後闢
雙闕會百僚動必嚴恪進無諠囂長幼之序不忒貴賤
之儀孔昭錚錚兮若萬國赴塗山而會秩秩兮如百官

仰太一而朝歲十月天地澄爽宮殿清曠風傳警蹕日
麗天仗於是右陳列辟左立丞相東西分而則別文武
儼以相向簪裾奕奕頌鸞鷲之具寮劍戟森森列熊羆
之名將帝容式展皇威克壯莫不上恭已以臨下下竭
誠而奉上觀其威儀允淑容止具篤天子負鳳宸以皇
皇正龍顏而穆穆百辟欣戴九賓悅服拔劍者懲懼而
慄慄飲酒者敬慎而肅肅故知君有威故能守其邦臣
有儀所以保其祿帝謂叔孫舊章斯存可以發揮我洪

德啓迪我後昆方將守而經國豈止煥而盈門不然何以表一人之貴知萬乘之尊

南蠻北狄同日朝見賦

以波瀛款塞成造闕庭為韻

穆 寂

我皇道叶神化功高睿奠萬國之廣斯臨八聖之業是纂遐哉窮髮之俗既竭赤誠邊爾椎髻之人亦輸丹款豈不以陰陽煥乎金鏡律呂諧乎玉琯德該動植而以信以寬仁及飛走而不靡不卯故得殊方述職異俗來

庭歸我玄造沐我皇靈曉逾赤坂以向日夕過白登以
占星磧路誠遙委毳幕羶裘之質山梯雖險致穿胸儻
耳之形然則自南自北或馳或渡俱為九譯之鄉各涉
萬里之路同臻禁地事且叶於不期并列盛時禮若符
於有素是以坦王道恢帝圖蕩然與龍山非隔廓爾將
鳳穴靡殊集六蠻而輝赫九域萃五狄而光耀八區邇
無不賓鄙周宣勤乎薄伐遠無不服笑諸葛矜於渡瀘
遂能革至性於方外柔獷俗於面內大行人明其近遠

懷方氏導其進退靡僭晷刻既從荔浦之源罔復斯湏
爰自榆林之塞有以見化溢含弘恩覃覆疇膳豐館給
禮洽郊勞孰云胡越之異來若同心且殊虞芮之爭會
如兩造以其踰絕漠逗懸巖蓋由君邁軒轅顛項臣掩
伊陟巫咸不然則焉能抵秦川來魏闕皆展遐方之貢
獻共備同日之朝謁者哉

第二

同前
韻

王起

我皇制百蠻以德輝刑八狄以威靈俾曠代之絕域同

一日而來庭則不叛不侵知遐邇之無外自南自北昭
聲教之永寧惟蠻也荒陬有倔强之號惟狄也絕漠有
桀黠之暴辭炎徼應感而偕來謝穹廬不期而兩造上
乃御正殿臨中區文物有耀聲明以殊小周王之賓肅
慎卑漢后之享單于於是卉服雲集旃裘風趨駿奔而
遠無不屆磨至而實繁有徒垂衣而朝三表自慙於制
虜止戈為武五月孰矜其渡瀘百辟式瞻九儀以配寧
有截而斯暢儼無譁而相對獻琛盡禮雜彩服以和光

蹶角展容望珠旒而欣戴若非越荒徼踰紫塞則南同
魚鱉安得仰龍章於舜年北喻豺狼未可親獸舞於堯
代是知歷寒鄉之膚發欽百度兮無闕忘沓嶂之蘄巖
彰九區兮克咸聖上惟北辰之位是纘匪南面之尊自
滿窮髮斯服雕題無算仰天威以懷柔化夷德為悃款
盛禮畢具幽遐既慕同寅協恭兮斯親在遠如邇兮斯
赴始差肩于著定之位終收跡於屢絕之路史臣書曰
美異俗而同臻象斯華而合趣則昔有梯山驟至航海

徑渡無蠻狄入覲之過

朝呼韓邪賦

以煥乎盛儀選掩前古為韻

失名

倬哉惟漢至德鴻融元功絢煥敷仁義於異域俾華夷
而同貫故能臣匈奴來單于超沙漠越余吾弃窮廬而
雲起望高闕而風趨屈膝而來有以見其蠢爾垂拱以
待是用表于巍乎况當行幸祠祀之禮崇甘泉泰畤之
儀盛肅肅乎萬物是備昭昭乎威容既正象胥以譯豈
言語之不通司儀式班示進退之必敬然後差行列辨

尊卑序璧羔皮帛之等第示要荒守衛之威儀冠帶之
容間彼荷韁被毳韶濩是作雜夫傑侏兒離雍容之禮
有則倔强之心不施玄塞永安寧蝟起兮於彼青蒲方
奏猶蟻伏而在斯信純化之雲布俾遠戎之星馳不然
何以其國則賒其人不遐修臣之節為國之華朝一人
於寓縣涉萬里之窮沙則周公明堂之儀寧九采之足
美而夏禹塗山之會雖萬國而何嘉且夫懷我有方所
由者漸德之為被我不可掩非慕義而有求奚尊君之

自貶是知撫御之道莫善於漢宣威儀之設莫盛乎甘泉美舞徒稱乎干羽鏤勳何媿於燕然布令陳辭之義行豈事成而後樹引領稽顙之容作乃瞻之而在前自可光九功服九土曠萬代而一時宜耀今而榮古

周公朝諸侯於明堂賦

以九垓向序外方同心為韻

謝觀

赫赫明堂居國之陽巍峩特立鎮壓殊方所以施一人所以朝萬國諸侯王面室有三總數惟九間大廟於正

位處大室於中雷啓閉乎三十六戶

一作扉

羅列乎七十

二牖左个右个為季孟之交分上圓下方法天地之奇
偶時也六年之初孟春之首有截而至無脛而走將欲
交正於成王之命所以立辟于周公之手洞八闔以臨
八極闢四門而來萬有所司脩班品於庭除執事肅文
物於前後及夫諸位散設三公冢崇當中階而列位與
羣臣而不同諸侯東階之東西面而北上諸伯西階之
西東面而相向諸子應門之東而鸚立諸男應門之西

而鶴望戎夷金木之戶外蠻狄水火而位配九采外屏
之右以成列四塞外屏之左而遙對朱干玉戚森聳以
相參龍揚豹韜抑揚而相侑肅肅沉沉巒崇壑深烟收
而卿士齊列日出而天顏始臨戴冕旒以當軒見八紘
稽顙負斧扆而南面知萬國歸心於是鏘金石揚律呂
動塤箎搖祝敵儼若思而立悄不言而鴈序一拜一
起嶽抃而齊傾舞之蹈之雷屯而復舉俄而翠華轉仙
仗迴恩覃率土化溢九垓合蠻貊以畢至盡梯航以爰

來彼禹有大室武作靈臺曷與此而同哉

文苑英華卷五十三

欽定四庫全書

文苑英華卷五十四

宋 李昉等 編

禋祀一

南郊賦一首

進三大禮賦表

朝獻太清宮賦

朝享太廟賦

有事於南郊賦

南郊賦

徐彥伯

維帝唐八十有五載鴻徽鑠於縣寓騰陽精握機矩還

攝提以產氣配神明而作主倬四后之在天伊萬物之
胥覩左日壑右星圃吹烈火於炎丘覲堅冰於委羽莫
不匍匐我聲教駿奔我珪組納大荒之管鑰伏堪輿之
扃戶茲可以孩黔羸扶盤古苞混茫而首出亦奚云於
三五哉於穆我皇纂戎而昌青氣搖社白雲入房輿天
地合契與日月齊光杖太一毆羣剛共工戮兮河嶽正
旬始滅一作三苗格兮星辰張輯稽古之禮物懸象外之舊
章雖配天復禹繼一作那嗣興湯者不其恧歟肇允神聖

浸發葆命芬德馨香崇庸祇敬吟蓼蕭以游渥合泉一作

台桑而蘊正闕石齟鈞飛沉翔泳擇明居之全法撰蒼

渠之闕令則太階平而玉衡正也庶績洪凝賡歌浩作

陰隲于下有孚顯若恢負勝之圖賁昭功之籥是以玄

龜遊乎湍瀨丹鳥吟于觀閣芝房菌蠢而玉英景雲璿

璨而金萼雙絡共舐一作抵之獸躑躅苑山一稔二米之

穎紛拏畎壑邦誦中齎吐歌小瑟歲合作噩日交長至

遘朔旦之明期擇純陽之正地欲陳大旅展時事告紫

宙之成功定皇天之寶位蜃鷲司典鴈鳩歲職崇泰壇
考星翼畫八卦以通道錯五行而辨域對越精祗森羅
正直木巽火而殷薦豫乘雷以罔極載師清野土訓掃
屢繚垣虹合參途電聯籠組帷以艾景覆皇邸以度煙
宮伯糾其禁內饗烹其鱣周廬攢構以戢晉列蠹抗莖
而翩綿繩繩都人濟濟多士九牧之守百蠻之子莫不
絜一作挈鴈提羔攢駟一作酸噓軌紛鴻溶以騰逗叛適皇
而怡儼或駢肩而側足候吾君之戾止若葵藿之傾離

光同江河之赴溟水也然後啟端門警仙蹕雙鳳矯首六
龍齊膝青旆冒雲紅旌彗日鏘玉鸞之鳴轆按金雞之
廣術傳畫角以啾嘈曳朱旗一作羊以駢坐蒲必切見吳都賦呵

風伯令戒道制玄冥使司律此靈祇所以保綏皇天所
以宥密於是闢龍次幸蜺幃鶉鳥司襄熊羆奉收皇帝
乃彰畫黻襲大裘端玉珽肅珠旒翼翼穆穆遂臻于園
丘躬孝享擁神休設天宗之六席援長發之二球盥以
明水薦以香羞陳蒼壁而咸事藉白茅而闡幽絜駢旒

之泔淡酌玄瓚之觥膠盛哉神

疑作坤言
后亞獻

極順天而見

邸乳祥開曾沙業薦赫禮數於彤壺布徽音於紫縣率
先於金薄之蠶謹覆以瑤筐之鷺皇后介禮恭茲亞奠
凝億兆之歡心注穹蒼之景盼紫微開兮天香滿神之
來兮軒星纂候黃鐘兮雪飛調大呂兮風暖戛雲和之
寶瑟吟孤竹之清管石麟夭矯團翠煙而上征徒鳳沕
霍迓鴻釐之無筭瑞氣蜿蜒於數向祥光熠燿於旄罕
三觥終獻萬祇呈醺昇羽節導靈羣凝肆夏以青晷颺

登歌而咽雲徽鸞鷲之颯沓致戩穀之網緼禮畢功成
天旋日轉宸儀允穆后庸胥展引大火之流旂迴夷庚
之翠輦倪三蠻

見甘泉賦

之崇構御六氣之遙辨覽太元之

神策張集靈之瑞典草木亨兮雷雨霂霂恩灑兮雲
霄靈對壽觴霞舉兮絲竹蘇筐筐岳立兮駢差我天子
方合符於大庭之國錯事以梁父之阿岱崩嶷兮清嶂
汶泓澄兮紫波屯千轂以霆轉整萬轡而星羅則述易
象者獻風行之繇談比興者奏時邁之歌蕩蕩乎巍巍

乎無得而名言矣遂作頌曰煌煌靈臺告成功兮我君
孝享亞坤宮兮純嘏布護延皇穹兮惟策代表霽升中
兮享壽千億傳無窮兮

進三大禮賦表

天寶十
三載

杜 甫

臣甫言臣生長陛下淳樸之俗行四十載矣與麋鹿同
羣而處浪跡於陛下豐草長林實自弱冠之年矣豈九
州牧伯不歲貢豪傑於外豈陛下明詔不側席思賢於
中哉臣之愚頑靜無所處以此知分沈埋盛時不敢依

違不敢激訴

一有默字

以漁樵之樂自遣而已頃者賣藥都

市寄食友朋竊慕堯翁擊壤之謳適遇國家郊廟之禮

不覺手足蹈舞形於篇章激吮甘液游泳和氣聲韻寢

廣卷軸斯存抑亦古詩之流希乎述者之意然詞理野

質終不足以拂天聽之崇高配史籍以永久恐倏先狗

馬遺恨九原謹稽首投延恩獻上納

三字一作獻納上表

進明

主朝獻太清宮朝享太廟有事于南郊等三賦以聞臣

甫誠惶誠恐頓首頓首謹言

朝獻太清宮賦

冬十有一月天子既納處士之議承漢繼周草弊用古
勒崇揚休明年孟陬將攄大禮以相籍越彛倫而莫儔
歷良辰而戒吉分祀事而孔修營室主夫宗廟乘輿備
乎寬裘甲子王以昧爽春寒薄而清浮虛閭闔逗蚩尤
張猛馬出騰虬捎熒惑墮汀火反旄頭風伯扶道雷公挾
舟一作輶通天台之雙闕警溟漲之十洲浩劫礪礪萬山
仙一作颼颼歛臻於一作乎長樂之舍崑入乎崑崙之丘太

一奉引庖犧在一作左右堯步舜趨禹馳湯驟壽會一作閔

宮之律萃拆元氣以經構斷紫雲而扞一作竦牆撫流沙

而承雷紛墮珠而陷一作隱碧燿波錦而浪繡森青冥而

欲雨艷色一作光炯而初晝於是翠蕤俄的藻藉舒就祝

融擲火以焚香溪女捧壺一作盤而盥漱羣有司之望幸

辨名物之難究瓊漿自間於棗盛羽客先來于介胄爍

皇祖之儲祉敬雲孫而及此詔軒轅使合符敕王喬以

視履積昭感於嗣續匪正辭於祝史君一作若肝蠻之有

憑肅風颺而乍起揚流蘇於浮柱金英霏而披靡擬雜

佩於曾巔孔

一作芝

蓋欹以颯纒中澁澁以迴復外蕭蕭

而未已上穆然注道為身覺天傾耳陳僭號於五代復

戰國於千祀曰嗚呼昔蒼生纏孟德之禍為仲達所愚

鑿齒其俗窳窳其孤亦烏高飛不肯止其屋黃龍哮吼不

肯負其圖伊神器泉兀而小人响喻厯紀大破瘡痍未

蘇尚攫拏於吳蜀又顛躓於西胡縱羣雄之發憤誰一

統於亨衢在拓跋與宇文豈風塵之不雜

一作殊

比聰鹿

及堅持渾貌豹而齊驅愁陰鬼嘯落日梟呼各擁兵甲
俱稱國都且耕且戰何有何無維累聖之徽典恭淑慎
以允緝茲火土之相生非符讖之備及煬帝終暴叔寶
初襲編簡尚新義旗爰入既清國難方覩家給竊以為
數子自誣敢貞乎五行攸執而觀者潛悟或喜至於泣
矧鱗介一有以字之鳴虞一作簾昆蚊以一有振螫感而遂通
罔不具集侂神光而紺閭一作閭羅詭異以戢香地軸傾
而融曳洞宮儼以嶷岌九天之雲下垂四海之水皆立

鳳鳥威遲而不去鯨魚屈矯以相吸掃太始之含靈卷
殊形而可挹則有虹蜺為鈎帶者入自於東揭莽蒼履
崆峒素髮漠漠至精濃濃條弛張於巨細覲披寫於心
胸蓋脩竿無隙而仄席已容裂手中之黑薄睨堂下之
金鍾得非擬斯人於壽域明返樸於玄蹤忽翳日而翻
萬象却浮雲一作空而留六龍咸讐跖而壯茲應終蒼黃
而昧所從上猶色若不足處之彌恭天師張道陵一有等字
洎左玄君者一有前字千二百官吏謁而進曰今王巨唐帝

之苗裔坤之紀綱土配君服宮尊臣商起數

一作得統數起

特立中央且大樂在懸黃鍾冠八音之首太昊斯啓青

陸獻千春之祥曠哉勤力耳目宜乎大帶斧裳故風后

孔甲充其佐山稽岐伯翼其傍至於易制取法足以朝

登五帝夕宿三皇信周武之多一作好漢祖之自強

且近朝之濫吹仍改卜乎祠堂初降素車終勤恤其後

有客白馬固漂淪不忘伊庶人得議實邦家之光臣道

陵等試本之於青簡探之以縹囊列聖有差夫子聞斯

於老氏好問自久宰我同科於季康敢

一作取

撥亂反正

乃止

一作此

其所長萬神開八駿迴旗掩月車畜雷騫七

曜燭九垓能事穎脫清光大來或曰今太平之人莫不

優游以自得况是蹴魏踏晉批周挾隋之後興乎更始

者也

一作哉

凡一作皆集本

朝享太廟賦

初高祖太宗之櫛風沐雨勞身焦思用黃鉞白旄者五
年而天下始一歷三朝而戮力今庶績之大備上方采

厖俗之謠稽正統之類蓋王者盛事臣聞之於里曰昔
武德已前黔黎蕭條無復生意遭鯨鯢之蕩汨荒歲月
而沸涓袞服紛紛朝廷多閏者仍亘乎晉魏臣竊以自
赤精之哀歇曠千載而無真人及黃圖之經綸息五行
而歸厚地則知至數不可以久缺凡材不可以長寄故
高下相形而尊卑心一作各異惟神斷繫之於是本先
帝取之以義壬辰既格於道祖乘輿即以是日致齋於
九室所以昭達孝之誠所以明繼天之質具禮有素六

官咸秩大輅每出或黎元不知豐年即

一作則

多而筐筥

甚實既而太尉叅乘司僕扈蹕望重闈以肅恭順法駕

之徐疾公卿淳古士卒精一

一作默

宗廟之逾深抵職

司之所密宿翠華於外戶曙黃屋於通術氣淒淒於前

旒光靡靡而嘉栗階有賓乍帳有甲乙升降之際見玉

柱生芝擊拊之初覺鈞天合律筍簾佗以碣磻干戚究

而婆娑鞀鼓塤篪為之主鐘磬竽瑟以之和雲門咸池

取之至空桑孤竹貴之多八音循

一作脩

通既比乎旭日

昇而氛埃滅萬舞陵亂又似乎春風壯而江海波鳥不
敢飛而玄甲嶠嶠以岳峙象不敢去而鳴佩剡劒

一作
燦

以星羅已而上乾豆以登歌美休成之既饗璧玉儲精
以稠疊門欄洞豁

一作洞壑
又作洞豁

而森爽黑帝歸寒而激昂

蒼靈戒曉而來往熙事莽而充塞羣心麋以振蕩桐花
未吐孫枝之鸞鳳相鮮雲氣何多官井之蛟龍亂上若
夫生弘佐命之道死配貴神之列則殷劉房魏之勲是
可以中摩伊呂上冠夔高代天之工為人之傑丹青滿

地松竹高節自唐興以來若此時哲皆朝有數四名垂

卓絕向不遇撥亂返正之主君臣父子之別

音別分
之別

奕

繁文武之雄注意生靈之切雖前輩之溫良寬大豪俊

果決曾何以措其筋力與韜鈴載其刀筆與喙舌使祭

則與食則血若斯之盛而已爾迺直于主索于祊警幽

全之物散純道之情

一作精

蓋我后常用惟時克貞營以

蕭合酌以茅明嘏以慈告祝以孝成故天意張皇不能

殘

一作珍

其瑞神奸妥帖不敢秘其精而無

一作撫

絕軌享

鴻名者

一有矣字

于以奏永安于以奏王夏福穰穰於絳闕

芳菲菲於玉笋

舜祠宗廟以玉笋

沛枯骨而破聾盲施殀胎而

逮鰥寡園陵動色躍在藻之泉魚弓劍皆鳴汗鑄金之

風馬霜露堪吸禎祥可把曾宮歔歔陰事儼雅薄清輝

於鼎湖之山靜餘響於蒼梧之野上窅然漠漠惕然兢

兢紛益所慕若不自勝瞰牙旗而獨立吟翠駁而未乘

五老侍祠而情

一作精

駭千官逖聽而思凝於是二丞相

進曰陛下應道而作惟天與能澆訛散淳朴登尚猶日

慎業業孝思烝烝恐一物之失所懼先王之咎徵如此

之勤恤匪懈是百姓何以報夫元首在臣等何以克其

股肱且如周宣之教親不暇漢武之淫祀相仍諸侯敢

於迫脅方士奮其威稜一則以微弱內侮

三字一作一言勸內

則以輕舉虛

一作飛

馮又非陛下之

一無之字

恢廓緒業其瑣

細亦曷足稱丞相退上跼天躅地授綬登車伊瀕

一作鴻

洞槍鼎皆

一作先

出為儲胥本枝根株乎萬代睿想經緯

乎六虛甲午

一有方字

有事於米

一作練

壇紺席宿夫行所如

初 凡一作皆集本

有事于南郊賦

蓋主上兆於南郊聿懷多福者舊矣今茲練時日就陽
位之美又所以厚祖考通神明而已職在宗伯首崇禋

祀先是春官修

一作條

頌祇之書獻祭天之紀令泰龜而

不昧俟萬事之將履掌次銳

一作閱

羶邸之則封人考壝

宮之旨司門轉致乎牲牢之繫小胥專達乎懸位之使
二之日朝廟之禮既畢天子蒼然視於無形澹然若有

所聽又齋心於宿設將盱食而匪寧旌門坡陁以前驚

穀騎反覆以相經頡

一作頓

魯城之軋軋軼萬方

一作戶

熒熒馳道端而如砥浴日上而如萍掣

一作製

翠旄於華

蓋之角彗黃屋於鈎陳之星神仙戍削以落羽魑魅

一作

魑

幽憂以固扃戰岐慄華擺渭掉涇地田田而風淅淅

天泱泱而氣清清

一作青青

甲冑乘陵轉迅雷於荆門巫峽

玉帛清迥霽夕雨於瀟湘洞庭於是乘輿霈然乃作

一作有

翳夫鸞鳳將至以冲融寥廓不可乎彌度聲明通於純

粹溟滓為之垠堦駟蒼螭而蜿蜒若無骨以柔順奔鳥

獲之黥繆徒有勢於殺縛朱輪竟野而杳冥金鏐

范萬切見

西京賦成陰以結絡吹堪輿以軒輊搶寒暑以前却中營

密擁乎太陽宸眷眇臨乎長薄熊羆彌

周禮小祝彌兵用此彌字

耳

以相舐虎豹高跳以虛攬上方將降帷宮之緜縞屏玉

軼以蠖畧

二字見甘泉賦

人門行馬以拱乎合沓之壇

一作場皮

弁大裘始進於穹崇之幕衝牙鏗鏘以將暮

一作集周衛

轆轤而咸若月窟黑而扶桑寒田燭稠而曉河

一作星落

肅定位以告絜諷嚴上而清超雲菡萏以張蓋春歲蕤

以建杓簪裾斐斐罇俎蕭蕭方面曲折周旋寂寥必本

於天王宮與夜明祭法王官祭日夜明祭月相射動而之地山林與

川谷俱標於是乎官有御事有職所以敬鬼神所以勤

稼穡所以報本返始所以度長立極玄酒明水之上越

席疏布之側必取先於稻秫麴蘖之勤必取著於紛純

紋一作文繡之飾惟三牲八簋豐備以相浴而蒼璧黃琮

寶歸乎正色先王之丕業繼紀一作起信可以永其昭配

羣望之徧祭在斯示有以明其翼戴由是播其聲音有一

以陳一有列從二字乎節奏以進退韶夏護武采之於訓謨鍾

石陶匏具之於楛概變萬形於動植聽官徵於砒磬英華發外非因乎筍簾之高和順積中不在乎雷鼓之大

既而鸞骨畦胃柴燎窟塊駉擘若一作赫葩一作斜晦

潰雷一作纏風升雪颯星碎拂勿徒濛一作渺溟芊滓

一作聖慮岑寂玄黃增霈蒼生顛昂毛髮清瀨雷公河

伯或駉駉以脩聳霜女江妃乍紛綸而晻曖執紱秉翟

朱干玉戚鼓瑟吹笙金支翠旌神光條歛祀事虛明於

是泔澠乎渙汗紆餘乎經營浸朱崖而灑朔漠瀚

一作洶

暘谷而濡若英耆艾涕而童子僂叢棘折

一作拆

而狴牢

傾是率土之濱覃酺醪以涵泳豈

一作非

奉郊之縣獨宴

慰以縱橫玄澤淡泞乎無極殷薦綢繆乎至精稽古之

時屢應符而合契聖人有作不逆寡

以雄

二字一作而推

成爾

乃孤卿侯伯羣儒三老儼而絕皮軒趨帳殿稽首曰臣

聞燧人氏已往法度難知文質未變太昊氏繼天而王

根啓閉於厥初以木傳子攄

一作據

終始而可見洎虞夏

殷周茲煥炳而葱菑秦失之於狼貪蠶食漢綴之以蛇

斷龍戰中莽茫

一疊茫字

夫何以

一無以字

從聖蓄縮曾不下眷

伏惟道祖視生靈之磔

一作磔

裂醜害馬之蹄齧呵五精

之息肩考正氣之無輟協夫詒孫以降使之造命更挈

一作潔

累聖昭洗中祚觸蹶氣慘黷乎脂夜之妖勢迴薄

乎龍蛇之孽伏惟陛下勃然憤激之際天關

一作闕

不敢

旅拒鬼神以

一作為

之嗚咽高衢騰塵長劍吼血尊卑配

宇縣刷插紫極之將頽拾清芬於已缺鑪之以仁義鍛之以賢哲聯祖宗之耿光卷夷狄之影撇蓋九五之後人人自以遭唐虞四十年來家家自以為稷禹王綱近古而不軌天聽貞觀以高揭蠢爾差僭粲然優劣宜其課密於空積忽微判定於興廢繼絕而後覩數統從首八音六律而惟新日起筭外一字千金而不減上曰吁昊天有成命惟五聖以受我其夙夜匪遑定一無實用定字素樸以守于嗟乎麟鳳胡為乎郊藪乃上帝之降鑒及

茲玄元之垂裕乎後夫聖以百年為鶉鷩口豆切道以萬

物為芻狗今何以此一有茫茫臨乎八極眇眇託乎羣后

此一字

端策拂龜於周漢之餘緩步濶視於魏晉之首斯上古
成法蓋其人已朽不足道也於是天子默然而徐思終
將固之又固之意不在抑殊方之貢亦不必廣無用之

祠金馬碧雞非理人之術珊瑚翡翠此一物何疑奉郊

廟以為寶增怵惕而一作孜孜况大庭氏之時六龍飛

御而一作歸 凡一作昏集本

文苑英華卷五十四